

**“ESKUALDUNA” ALDIZKARIAREN MENDEURRENEKO**

**MEZA SAINDUKO PREDIKUA**

**San Andreseko elizan**

*Baiona, 1987-III-21*

*Pierre Molères, Baionako Apezpikua*

“Zoazi garbitzerat, Ziloe-ko mainutegirat”.

Sortzetik itsuak gira denak.

Bainan denak gomitatuak gira,

bataio-uretan sartzerat.

Gutarik bakotxa bataiorat deitu da,

bai eta gizon guziak,

eta beraz kultura guziak.

Herri bakotxak badu bere molde berezia,

mintzatzeko, bizitzeko,

gauzen senditzeko, bere berri emaiteko;

baditu bere ontasunak, bere ixtorioa, bere xedeak,

badu beste herrien artean bere tokia.

Horiek guziek dute egiten

herri baten kultura.

Ziloe-ko iturrian garbitu zen eta argitu,

sortzetik itsu zen gizona.

Ziloe hitzak erran nahi du: igorria.

Jaunak igorri Kristo da gure argia.

Ziloe-ko uretan garbitzearen eta argitzearen

beharra badute

gizon guziek eta kultura guziek.

\* \* \*

Itsua sendatu zen.

Bainan lekuko guziek

galde bera dute ezpainetan: “Nola?”

“Nola ideki zaizkitzu begiak?”

diote auzoek.

Farisauek aldiz:

“Nola ditake holakorik?”

“Nola” horrekin, nahi lukete jakin,  
 zer jukutriaren bidez  
 duen Jesusek itsua argitu;  
 holako gauza miresgarria  
 gizon xoil baten ahalen heinekoa  
 balitz bezala.

Ez dute gorago joan nahi.  
 Ukatzen dute mirakuluaren egilea;  
 gertakari hortan ez dute ezagutu nahi  
 Jainkoaren eskua.

Jesus nor ote den,  
 hortan da auzia.  
 Farisauek ez dezakete onets,  
 Jainkoak igorria dela.  
 Itsuak ihardesten diote:  
 “Ez balitz Jainkoaren ganikakoa,  
 ez lezake deus egin”.

Gutarik bakotxa ere  
 maiz hola ari da:  
 Jainkorik ez balitz bezala,  
 Jainkoa ikusi nahi ez balu bezala.

Kultura ainitzek ere  
 Jainkoa kanporat botatzen dute:  
 edo osoki baztertuz,  
 edo aipatu gabe utziz:  
 bakotxak egin dezala nahi duena,  
 Jainkoari baia edo eza eman.

Ez dezakete jasan,  
 Jainkoak lehen tokia har dezan,  
 gizonen arteko bizian  
 Jainkoa sar dadin.

Zuzen da, ez ditzagun  
 eremu guziak nahas:  
 mundua eta Jainkoaren erresuma.  
 Zuzen da, Eliza-buruzagiak  
 beren alorrean egon ditzen,  
 mundu huntako kargudunekin  
 sobera josi gabe,  
 eta heien lekua hartu gabe.

Bainan ohart gaiten  
 zer ekar dezoken Kristok,  
 zer ekar Elizak,  
 herri bati, kultura bati.

Beste erakaspén bat badauka  
 egungo Ebanjelioak:  
 zer den jende umilen,  
 apalen, pobreen fedea.

Beha dezogun gizon itsu horri:  
 nolako zentzuaren jabe den,  
 eta Jainkozko gauzeri zoin idekia.

Farisauen galde bihurrieri  
 sanoki ihardesten diote,  
 arralleria doi batekin.  
 Heiek erraiten diote:  
 “Guk bazakiaguk, gizon hori, Jesus,  
 bekatoros bat dela”.  
 Harek beretik:  
 “Bekatorosa denetz, ez dakit;  
 nik dakitana, itsu nintzela  
 eta orai ikusten dutala.  
 —Nola ideki dauzkik begiak?  
 —Jadanik errana dautzuet,  
 eta ez duzue entzun.  
 Zertako nahi duzue berriz ere aditu?  
 Ala zuek ere haren dizipulu  
 nahi duzue jarri?”  
 Solas-aldi hortan, itsuena zoin ote da?

Holaxe dabilta orai ere,  
 Jainkoaren adixkide direnak.  
 Biziko neke eta nahigabetan,  
 Jainkoak igortzen diote argi eta indar,  
 inguruko tzarkeria eta ezazolkerien artean  
 leial egon ditén.

Geroago eta barnagodanik ezagutzen dute  
 Kristo Jauna,  
 itsuak ere emeki-emeki ezagutu zuen bezala.  
 Lehenik aipatzen zuen  
 “Jesus deitzen duten gizona”,  
 gero “profeta”,  
 gero berriz “Jainkoaren ganikakoa”,  
 azkenik “gizonaren Semea”,  
 izen horrek Liburu Sainduetan  
 erakusten baitu Jaunaren zerbitzaria  
 eta azken eguneko Jujea.

Jende umilak Jainkoari hurbil-hurbila daude,  
 eta guri ere heien bidez  
 zaiku Jainkoa agertzen.

Euskaldunak, zer makurra litaken,  
zuen herritarrentzat, gaztentzat,  
herria zaindu nahi dutenentzat,  
onartzen balute  
Kristoren eta Elizaren ganik  
berex egoitea!

Aintzinekoek utzi ondarerik handiena  
gal lezakete,  
bai eta geroari buruzko  
ontasunik baliosena.

Uste gabetarik,  
eta behar-bada nahi gabetarik  
jar litazke  
heietaz ederki baliatuko diren  
kanpotikako artzain batzuen meneko.

Girixtino fedeak  
iraun dezala gutartean.  
Sinesten duenak ikusten du,  
gaua garraitzen du.

Itsuak bezala,  
erran dezogun Jesusi: "Sinesten dut".

Itsuak bezala,  
hauta dezagun argia.

Halabiz